

OHR pozdravlja spremnost RS da sarađuje sa Državnim sudom i međunarodnom zajednicom u borbi protiv kriminala

OHR pozdravlja tijesnu saradnju koju je Ministarstvo unutrašnjih poslova RS ovih dana ostvarilo sa međunarodnom zajednicom i Sudom BiH u borbi protiv kriminala. Ministarstvo unutrašnjih poslova odigralo je posebno pozitivnu ulogu u dovođenju pred sud predmeta Milaković.

Aktivnosti koje je Ministarstvo unutrašnjih poslova poduzelo ovih dana direktno su dovele do oslobađanja šest žena iz istočnoevropskih zemalja, koje su, kako se navodi, protiv njihove volje bile držane u jednom noćnom klubu u Prijedoru, čiji je vlasnik Milorad Milaković. Ovaj slučaj je primjer efikasne saradnje između policijskih organa, međunarodne zajednice i sudova. Informacije o ovim ženama dostavio je SFOR Ministarstvu unutrašnjih poslova RS, koje je odmah preduzela energične mjere. Važno je isto tako napomenuti da je Ministarstvo unutrašnjih poslova RS, uviđajući da je trgovina ljudima međunarodno krivično djelo, prebacilo cijeli predmet zajedno sa pritvorenicima u nadležnost Tužilaštva BiH. Ovaj predmet će se dalje procesuirati pred Sudom BiH.

Sud Bosne i Hercegovine uspostavljen je uz snažnu podršku visokog predstavnika da bi radio na upravo ovakvim slučajevima. Trgovina ljudima je međunarodno krivično djelo, te stoga Sud BiH i Tužilaštvo BiH imaju nadležnost da procesuiraju ovu vrstu krivičnih djela.

Uloga međunarodne zajednice se sastojala u tome da podstakne veću koordinaciju i saradnju između organizacija koje se bore protiv kriminala na svim nivoima BiH i u okviru regiona.

Razmjere organiziranog kriminala na Balkanu zaista predstavljaju krizu koja se štetno odražava na stabilnost svih država u regionu. Ova se kriza mora direktno rješavati, što i jeste razlog da svi kojima je u nadležnosti borba protiv organiziranog kriminala moraju raditi zajedno.

Visoki predstavnik je rekao: "Organizirani kriminal tiče se svakog građanina BiH, bez obzira na nacionalnost i mjesto gdje živi. Prema tome, pozdravljamo novoiskazanu spremnost Ministarstva unutrašnjih poslova RS da sarađuje sa međunarodnom zajednicom i relevantnim institucijama, uključujući Sud Bosne i Hercegovine, u borbi protiv ove pošasti".